



## 27 novas abitaziuns per juvenils

Samedan: La societad cooperativa «Abitar fin 25» ha preschentà las novas abitaziuns a la publicitad.

9



## Occurrenza sin 1837 meters sur mar

L'anteriura cabina «La Gondla» da la Diavolezza serva oz sco lieu per occurrenzas culturalas.

9

DIE SÜDOSTSCHWEIZ

# LA QUOTIDIANA

Redacziun: Via comerciala 22, 7007 Cuirra, tel. 081 920 07 10, fax 081 920 07 15

## Il model C nun è bainvegnì dapertut

■ (anr/ac) En il decurs dals davos onns è il model C vegnì introduci en la plipart dals stgallims superiors dal chantun Grischun e quai cun sustegn finanziel dal chantun. Ussa entschivan las emprimas vischnancas a dubitar davart il niz da quel model C. Tranter auter fan ellas valair motivs finanzials per turnar tar il model B d'antruras. La scola da Tavau ha fatg a savair da renunziar al model C, la scola da Cuirra giavischia ina examinaziun externa schebain ina midada tar il model B fa senn. Domaduas vischnancas han da batter cun problems finanzials. La suprastanza da la vischnanca da Zezras ha medemamain proponì da puspè midar da C tar B. Il suveran n'ha dentant vulì savair nagut dad ina tala midada ed ha renvià la proposta.

> PAGINA 5

## In reginavel culinaric per nas fins

■ (anr/gns) Cun il Grand Opening en l'hotel Kempinski ha cumenzà l'emna per mangiabains, il Gourmet Festival a San Murezzan e conturn. Otg cuschiniers internaziunals cun total 17 stailas da «Michelin» èn da la partida e van davairas als cunfins da la purschida culinarica. Già per la 21avla giada han ospitants dals megliers hotels da l'Engiadin'Ota envidà al Gourmet Festival, ina occurrenza che attira er quest onn bunamain 4000 persunas en la regiun. Sche stars cuschiniers envidan a maisa e la societad illustra sa lascha gustar las buccadinas finas lura giogan er ils daners nagina rolla. I dat da tuttas sorts occurrenzas culinaricas e quai per pretschs fin bunamain 700 francs. Tantas stailas da «Michelin», chapitschas e puncts da «Gault Millau» en in culp, quai datti be a San Murezzan.

> PAGINA 7

## In Sursilvan alla testa?

La primavera ha l'Uniuon dils catschadurs da patenta dil Grischun d'eleger siu tgamun

DA HANS HUONDER / ANR

■ Peter Janki da Vuorz ei staus il davos Sursilvan alla testa dall'Uniuon cantunala dils catschadurs da patenta dil Grischun. Questa primavera savess Robert Brunold suandar el. Il commember dalla Secziun da catschadurs Sursaisa ha numnadamein inoltrau sia candidatura sco successur da Beat Angerer da Tavau che presidescha l'uniun dapi sis onns. El e ses collegas dalla suprastanza centrala han numnadamein demissiunau. Per Robert Brunold (44) füss quei presidi buc igl emprem al tgamun d'ina organizaziun da catschadurs. Siat onns ha el presidiu l'uniun regiunala dalla Surselva e sis onns sia secziun. Tonaton ha el fatg profundas ponderaziuns avon che sedecider per quella candidatura: «Igl ei in uffeci cumbinau cun bia lavur, mo sin fundament dallas structuras novas dall'uniun cantunala ei quella activitad era dil temps enneu supportabla.» Per ils sis posts dalla suprastanza



Robert Brunold ensemen cun sias duas feglias Patricia e Seraina ed in bi buc camutsch.

MAD

centrala che daventan vacants ein tut en tut tschun persunas semessas a disposiziun entochen ussa. La radunonza da delegai

dall'Uniuon cantunala dils catschadurs ch'elegia la suprastanza cantunala seraduna ils 24 da matg 2014 a Tavau. Igl ei la

100avla radunonza da delegai dall'uniun.

> PAGINA 3



# Robert Brunold per Beat Angerer?

L'Uniu cantunala dils catschadurs da patenta dil Grischun elegia in niev tgamun uonn

DA HANS HUONDER / ANR

■ **Robert Brunold da Sursaiassa candidescha sco president dall'Uniu cantunala dils catschadurs da patenta dil Grischun. Las elecziuns han liug la fin da matg. Il Sursilvan vul succeder a Beat Angerer da Tavau che ha demissionau.** Ils davos decennis ha l'Uniu cantunala dils catschadurs midau mintgamai suenter sis onns sia suprazonza cantunala e cun ella il president. Uonn eis ei sis onns dapi che las secziuns dil contuorn da Tavau ein semessas al tgamun dall'uniu. Ussa seretilan ellas. Sin fundament dils statuts novs che l'uniu ha approbau alla davosa radunonza da delegai sto la suprazonza centrala buca pli consistier mo da commembras e commembers d'ina suletta regiun. Ella sa pia vegnir formada da persunas digl entir cantun Grischun. La suprazonza gronda, che seraduna meins savens che la suprazonza centrala, consista egl avegnir – sper la suprazonza centrala – dils presidents dils districts. Era quei ei ina novaziun, realisada sin fundament dalla revisiun dils statuts.

## In Sursilvan?

Dalla suprazonza centrala en uffeci demissionesch *Beat Angerer* (president), *Gaudenz F. Domenig* (vicepresident), *Hannes Parpan* (actuar), *Martin Carigiet* (cassier), *Hanspeter Ambühl* (capotiradur) ed *Enrico Cola* (menader dil ressort



**Beat Angerer ei vegnius eligius igl onn 2008 sco president dall'Uniu cantunala dils catschadurs da patenta dil Grischun. Questa primavera terminescha el sia incumbensa.**

FOTO H. HUONDER

da mutaziuns). *Hansruedi Andreoli* stat a cumission da tgira ed appartegn en quella funcziun era alla suprazonza centrala.

El «Catschadur grischun» dil november ha la suprazonza centrala buca mo communicau sia demission, mobein era publicau informaziuns davart la pusseivladad da candidar pils posts che daventan vacants questa primavera. Sin fundament da quella comunicaziun ein pliras persunas s'annunziadas per in dils posts en suprazonza centrala. Denter quellas sesanfla era *Robert Brunold* (44) dalla Secziun da catschadurs Sursaiassa. El ha il medem mument annunziou siu interess pil presidi. La davosa ga che la Surselva ha giu in representant al tgamun dall'Uniu cantunala dils catschadurs da patenta dil Grischun ei stau 1990. Lu ei *Peter Janki* da Vuorz seretratgs da quella activitad suenter in cuoz da sis onns. Dapi lu ei l'uniu cantunala vegnida presidiada da representants dalla Portenza, Engiadina, Cuera e contuorn sco era da Tavau.

## Differents motivs

Per sia candidatura ha Robert Brunold differents arguments: «Jeu sundel dil meini che la regiun dalla Surselva seigi puspei en roda. Leutier vegn denton surtut miu interess per la catscha da patenta. Per quella less jeu s'engaschar era egl avegnir.» Robert Brunold ha presidiau ils davos siat onns l'uniu regionala dils catschadurs dalla Surselva. Medemamein eis el staus diesch onns commember dalla suprazonza dalla Secziun da catschadurs Sursaiassa, da quei sis onns sco par-

tura. Dapi treis onns eis el era representant dalla Foppa ella suprazonza gronda dall'uniu cantunala. Robert Brunold che lavura sco fiduziari a Glion ei maridau e bab da dus affons. Alla catscha va el dapi 1990. «Avon che inoltrar mia candidatura haiel jeu secapescha fatg ponderaziuns era partenent la lavur da quei presidi. Senza la structura nova cun in post da secretariat fuss quei engaschament buca vegnius en damonda per mei. Aschia cheu duess il pensum da lavur esser supportabels», di Robert Brunold. Ei semuossi denton era pli e pli ch'igl interess per quei presidi seigi buca fetg gronds. Ina soluziun stuevi ei pia dar. Alla 100avla radunonza da delegai dalla Uniu cantunala dils catschadurs da patenta dil Grischun ils 24 da matg 2014 a Tavau vegnan era ils ulteriurs commembers dalla suprazonza centrala eligi. Per quella stattan a disposiziun *Noldi Tiri*, *Nina Gansner*, *Marco Schnell* e *Flurin Filli* sco era *Hansruedi Andreoli* sco president dalla cumission da tgira. Il mument maunca aunc in(a) candidat(a). Cun varga 8000 commembras e commembers, reparti sin 74 secziuns, ei l'Uniu cantunala dils catschadurs da patenta dil Grischun ina dallas grondas uniuns el cantun. Organisaziuns affiliadas all'uniu cantunala ein il Club da tgauns da saung Grischun, la grupa regionala dil Grischun dil Club da tgauns da catscha dalla Svizra e l'Uniu da catscha e patria dil Grischun ella Bassa.